

## CONVENIO DE COLABORACIÓN ENTRE A AXENCIA DE TURISMO DE GALICIA E O CONCELLO DE MORAÑA PARA OBRAS DE RECUPERACIÓN E ACONDICIONAMENTO DA PONTE DA ROZA

O xerente de Turismo de Galicia

### DECLARA:

Que esta Axencia Turismo de Galicia formalizou co Concello de Moraña o instrumento convencional arriba referido por un período de vixencia que abrangue dende a data da súa sinatura ata o 31 de decembro de 2026.

Que o instrumento convencional ten por obxecto establecer as bases de colaboración entre a Axencia de Turismo de Galicia e o concello de Moraña para recuperación e acondicionamento da Ponte da Roza no río Umia.

Que existe converxencia de intereses entre as entidades asinantes en orde á consecución obxecto referido.

Que o instrumento convencional que se pretende asinar se **fundamenta** no seguinte:

**Primeiro.-** A Axencia Turismo de Galicia, en virtude do disposto no artigo 9 dos seus estatutos, aprobados polo Decreto 196/2012, do 27 de setembro, é a entidade pública instrumental do sector público autonómico de Galicia á que lle corresponde o impulso e execución da política turística da Xunta de Galicia en relación coa promoción da calidade e a innovación, o desenvolvemento, mellora, información e difusión do sector turístico galego, potenciando a devandita oferta, mediante a comercialización, información e difusión do produto turístico da Comunidade Autónoma de Galicia.

Para lograr esta finalidade a Axencia Turismo de Galicia acomete, no ámbito das súas competencias, un decidido apoio á promoción e fomento do sector turístico de Galicia a través daquelas accións que lle permiten acadar os seus obxectivos.

**Segundo.-** O Concello de Moraña pretende recuperar a ponte da Roza, que se atopa no seu territorio, e poñela en valor. Con esta actuación búscase desestacionalizar a oferta turística, xa que esta ponte atópase no percorrido de rutas de sendeirismo e de áreas recreativas que se empregan durante todo o ano. A zona de Fontenla en Moraña (Pontevedra) ofrece rutas de sendeirismo caracterizadas polo seu



patrimonio etnográfico, ríos e muíños. Destacan itinerarios que conectan Fontenla con Chaián, Santa Cruz e os muíños de As Laxes. Son comúns os roteiros de dificultade media pola contorna.

O Concello de Moraña atópase no interior da provincia de Pontevedra, cun rico patrimonio etnográfico e arquitectónico constituído por conxuntos de pontes, hórreos, muíños, lavadoiros, ermidas, antigas minas, capelas, torres, cruceiros, etc, todos eles proba das raíces históricas e sinal do protagonismo da pedra e do traballo dos canteiros. Esta actividade artesanal no traballo da pedra é un elemento cultural e histórico significativo da zona, influíndo na súa arquitectura e patrimonio local

As obras que se pretenden realizar son basicamente obras de recolocación das pezas de pedra que configuran a propia ponte e que se atopan caídas e apoiadas unhas contra outras e incluso impedindo o curso da auga, reconstrución de apoios de cachotaría, acondicionamento do acceso e limpeza da zona, e de xeito mais desagregado consisten no seguinte:

- Limpeza das distintas pezas que compoñen a ponte, coa eliminación de toda a vexetación adherida; así como o acondicionamento e limpeza nas marxes do río, eliminando maleza e árbores rotas;
- Reconstrución dos muros de apoio das lousas de pedra da ponte, en cachotaría de pedra granítica;
- Colocación ou reposición das pedras de perpiaño da ponte que se atopan fóra da súa posición, estando apoiadas contra outras ou incluso no leito río;
- Realizar acceso á ponte mediante chanzos en perpiaño coas pedras existentes ou aporte de novas pezas;
- Colocación das pedras pertencentes á beira, que actualmente se atopan somerxidas na auga, para permitir que a auga siga o seu curso por debaixo da ponte, sen invadir o acceso á mesma;
- Reconstrución da calzada de pedra para acceder á ponte

**Terceiro.-** A Estratexia de Turismo de Galicia 2030 ten como misión impulsar un turismo auténtico e sostible. Esta articúlase a través de misións, sendo unha delas a mobilidade, conectividade turística e reequilibrio territorial. Unha primeira liña de traballo incide en mellorar a percepción do destino e garantir e facilitar información sobre este. En segundo lugar, o turismo é a grande actividade económica capaz de redistribuír riqueza e facilitar emprego en áreas especialmente vulnerables e que afrontan o reto demográfico. A estratexia busca apuntalar o turismo rural cara ao ano 2030,



mellorando a súa planificación, facilitando investimentos e xerando novas experiencias, máis atractivas e innovadoras, pero, sobre todo, que reforcen a cultura e a identidade local.

Ademais, dentro da misión 2 de sostibilidade integral, a medida 2.4 de valorización de actividades turísticas en contornas naturais ten como obxectivo favorecer a creación de experiencias de turismo activo, deportivo ou ecoturismo, un modo de viaxar que adoita transcorrer en espazos naturais e en estreito contacto coa natureza. Galicia é percibida como un territorio verde, ideal para gozar de actividades de turismo activo ou de experiencias vencelladas á natureza. O impulso ao ecoturismo, a promoción do cicloturismo e actividades BTT, as experiencias de turismo activo e o aproveitamento das infraestruturas vencelladas son exemplos de actuacións que se desenvolverán.

Que este proxecto supón a posta en valor dos recursos turísticos do concello, o que tamén contribuirá á revalorización do turismo da Comunidade Autónoma.

Que a través deste convenio, outórgase ó Concello de Quiroga unha subvención directa en virtude do disposto no artigo 19.4 c) da Lei 9/2007, do 13 de xuño, de subvencións de Galicia, polas razóns de interese público, social, económico e humanitario expostas nos puntos anteriores que dificulta a súa convocatoria pública, de conformidade co previsto no artigo 26.2.a) da Lei 9/2007 do 13 de xuño, de subvencións de Galicia.

Que os intereses converxentes das partes asinantes exclúen o ánimo de lucro, e non poden satisfacerse axeitadamente mediante a celebración dun contrato dos contemplados Lei 9/2017, do 8 de novembro, de contratos do sector público, ou doutro instrumento alleo á natureza estritamente convencional.

En atención ao exposto, e a fin de dar cumprimento ao preceptuado no artigo 15.2. da Lei 1/2016, de 18 de xaneiro, de transparencia e bo goberno, estímase xustificado o recurso á sinatura do instrumento convencional que se pretende, con exclusión doutras figuras.

E para que conste, asínase esta memoria, en Santiago de Compostela

O xerente de Turismo de Galicia

Antonio Casas Calviño

